

佛说蚁喻经 1 卷

No. 95 [~M. 23, Vammika sutta.]

佛说蚁喻经

西天译经三藏朝奉大夫试光禄卿传法大师赐紫臣施护奉 诏译

尔时，世尊放大光明普照耀已，告苾刍众言：「汝等当知！于一时中有诸蚁聚，夜中出烟，昼日火然。有一婆罗门，见是事已，乃作是言：『若有执持快利刀者，必能破散其聚。』如是言已，次复见一大龟，其婆罗门亦作是言：『若有执持快利刀者，必能破坏。』次见诸水母虫，次见一水蛭虫，次见诸阿西苏那虫，次见一大蛇，次见一揅陀钵他虫，次见一[咎-人+几]哥嚩咤虫，其婆罗门见彼诸虫已，皆如前言。最后见一大龙，婆罗门言：『如我所见，其事云何？唯佛世尊悉能了知。』实时往诣一苾刍所，具陈上事，复言：『苾刍！汝以此事为我问佛，使我疑心而得开晓，如佛所说我当忆持。何以故？苾刍！我不见彼天人世间沙门婆罗门众中，有以此义能问佛者，是故不能使诸疑心而得开晓。』

「时彼苾刍即如其言，来诣我所，到已礼足退住一面。具陈上事已复发问言：『如婆罗门所见蚁聚，其事云何？夜中出烟、昼日火然，此复云何？又见大龟、水母虫、水蛭虫、阿西苏那虫、大蛇、揅陀钵他虫、[咎-人+几]哥嚩咤虫、大龙，此等所见皆是何相？即彼婆罗门复是何人？何故名为利刀破散？愿佛为说。』

「诸苾刍！我时谓彼苾刍言：『其蚁聚者，即是一切众生五蕴聚身。夜中出烟者，即是众生起诸寻伺。昼日火然者，即是众生随所寻伺起身语业。大龟者，即是五鄣染法。水母虫者，即是忿恚。水蛭虫者，即是慳嫉。阿西苏那虫者，即是五欲之法。蛇者，即是无明。揅陀钵他虫者，是疑惑。[咎-人+几]哥嚩咤虫者，是我慢。龙者，即是诸阿罗汉。婆罗门者，即是如来。应

供。正等正觉。快利者，即是有智之人。刀者，即是智慧。破散者，即是发起精进胜行。』

「诸苾刍！于汝意云何？彼所见相以要言之，即是一切众生五蕴聚身羯逻蓝等，父母不净之所出生，四大合成，虚假色相，麤恶劣弱，积集苦恼毕竟破坏。而诸众生不能觉知，于昼夜中起诸寻伺，而身语业不善施作，五鄣烦恼之所覆蔽，耽着五欲，增长无明，生我慢心，于诸圣法疑惑不决，忿恚怪嫉，念念发起，不求解脱。是故如来。应供。正等正觉，欲令诸有智者发精进行，修习智慧，断诸烦恼，趣证圣果。汝诸苾刍！已尽诸漏证阿罗汉果，故说如龙。」

「复次，诸苾刍！过去未来诸佛世尊，悲愍利乐一切众生，欲令断诸烦恼趣证圣果，为诸声闻广说是义。我于今日亦如诸佛，乃以此缘为汝宣说。汝诸苾刍！忆念是事，当于旷野空舍、山间树下、岩穴庵室诸寂静处，谛心思惟观察是义，无令放逸生退转心，亦复转为他人开示教导，普令修习得大快乐。」

尔时世尊为诸苾刍如是说已，而诸苾刍，皆悉信受。

佛说蚁喻经

【经文信息】大正藏第 01 册 No. 0095 蚁喻经

【版本记录】CBETA 电子佛典 Rev. 1.9 (Big5)，完成日期：2010/02/26

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，张文明大德提供，北美某大德提供，法雨道场提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】
